



TEKS UCAPAN

**YB DATUK HAJAH AIMAN ATHIRAH BINTI SABU
TIMBALAN MENTERI PEMBANGUNAN WANITA, KELUARGA DAN
MASYARAKAT**

**PROGRAM JERAYAWARA KASIH KPWKM
@ADVOKASI ANTIGANGGUAN SEKSUAL NEGERI PERLIS
DEWAN SJK (CINA) KHOON AIK, KANGAR, PERLIS
29 OKTOBER 2023 (AHAD)
11.00 pagi**

Bismillahir Rahmanir Rahim

Assalamualaikum Warahmatullahi Wabarakatuh,
Salam Sejahtera dan Salam Malaysia Madani.

(SALUTASI)

LAMPIRAN SALUTASI DISEDIAKAN

PENDAHULUAN

1. Alhamdulillah, Segala Puji Bagi Allah SWT, Tuhan sekalian alam kerana dengan limpah kurniaNya dapat kita berkumpul pada pagi ini dalam **Program Jerayawara Kasih KPWKM @Advokasi Antigangguan Seksual Negeri Perlis.**
2. Pertama sekali, saya ingin menyampaikan setinggi-tinggi penghargaan dan ucapan terima kasih kepada semua Ketua-ketua Jabatan Kerajaan Negeri Perlis dan Kerajaan Persekutuan, badan-badan korporat, persatuan majikan dan

sekerja, pertubuhan bukan kerajaan (NGO) serta rakyat negeri Perlis yang turut hadir pada pagi ini.

3. Sesungguhnya, kehadiran tuan-tuan dan puan-puan pada pagi ini menunjukkan solidariti, sokongan serta kebersamaan dalam menyokong agenda kesejahteraan masyarakat bagi mencapai persekitaran yang selamat dan kondusif untuk semua.
4. Untuk makluman semua, Perlis merupakan negeri yang ke-13 dalam siri jelajah Program Jerayawara Kasih KPWKM

@Advokasi Antigangguan Seksual yang diadakan di seluruh negara.

5. Ini merupakan manifestasi komitmen dan usaha berterusan kerajaan melalui Kementerian Pembangunan Wanita, Keluarga dan Masyarakat untuk memperkasakan wanita dan seterusnya mensejahterakan masyarakat agar pembangunan negara lebih seimbang dan mampan selaras dengan konsep Malaysia Madani.

LATAR BELAKANG

Puan-puan, tuan-tuan, hadirin yang saya kasihi sekalian.

6. Isu gangguan seksual bukanlah sesuatu yang baharu. Selari dengan peredaran masa serta dengan penggunaan media sosial yang meluas oleh masyarakat, gangguan seksual juga telah mengalami perubahan daripada hanya secara fizikal kepada dalam talian.

7. Walaupun masalah ini bukan perkara yang mudah untuk ditangani, adalah sangat penting supaya kesedaran mengenai **isu gangguan seksual serta isu jenayah intip dan hendap atau 'stalking'** perlu ditingkatkan dan diuar-uarkan kepada semua.

8. Salah satu cabaran dalam menangani gangguan seksual ialah apabila sesetengah pelaku menganggap tindakan mereka sebagai jenaka yang tidak berbahaya atau salah faham. "Alah, saya gurau je."

9. **Ingin saya tekankan di sini, seharusnya tiada ruang langsung diberikan kepada gangguan seksual, sama ada secara terang-terangan atau jenaka.**

10. Kesan gangguan seksual kepada mangsa tidak terhad pada gangguan mental sahaja. Malah kesannya terhadap mangsa adalah sangat negatif, termasuk trauma dan ketakutan yang berpanjangan. Ianya juga boleh mendorong kepada jenayah seksual yang lebih serius seperti jenayah cabul dan rogol.

11. Statistik yang dilaporkan oleh Polis Diraja Malaysia (PDRM), menunjukkan bahawa jumlah kes gangguan seksual yang dilaporkan telah meningkat daripada **378 kes pada 2020 dan kepada 506 kes pada 2021**. Walau bagaimanapun, terdapat **sedikit penurunan pada tahun 2022 iaitu kepada 477 kes**. Jumlah kes yang dilaporkan ini adalah melibatkan lelaki dan wanita.

12. Namun, majoriti mangsa adalah daripada kaum wanita iaitu sebanyak **354 kes pada tahun 2020, 446 kes pada tahun 2021 dan 416 kes pada tahun 2022**. Statistik ini jelas membuktikan

bahawa setiap tahun, lebih **90 peratus** daripada kes **gangguan seksual adalah melibatkan mangsa di kalangan kaum wanita.**

13. Pada tahun 2022, terdapat tujuh (7) kes gangguan seksual dilaporkan di negeri Perlis iaitu 1.5% daripada keseluruhan kes yang dilaporkan di seluruh negara dan kesemuanya melibatkan gangguan seksual terhadap kaum wanita.
14. Selain itu, kes gangguan seksual yang melibatkan kanak-kanak juga adalah membimbangkan iaitu berjumlah **35 kes**

pada tahun 2022 di seluruh negara. Tiada kes melibatkan kanak-kanak dilaporkan di negeri Perlis bagi tahun 2022.

15. Namun, kita harus akui bahawa terdapat banyak kes gangguan seksual yang tidak dilaporkan kepada pihak berkuasa dan jumlah yang sebenar adalah lebih tinggi daripada yang dilaporkan.
16. Di samping itu, berdasarkan laporan UNICEF Malaysia, pada tahun 2021, sekurang-kurangnya 4 peratus daripada kanak-kanak yang berumur 12 hingga 17 tahun di Malaysia yang

menggunakan internet **mengalami ancaman eksploitasi dan penderaan seksual yang jelas dalam talian.** Ini termasuk diperas ugut untuk terlibat dalam aktiviti seksual, imej seksual mereka dikongsi tanpa kebenaran, atau dipaksa untuk melakukan aktiviti seksual melalui janji ganjaran wang atau hadiah.

17. Justeru itu, kita harus sedar akan hakikat bahawa gangguan seksual boleh terjadi di mana – mana sahaja, dalam apa jua bentuk dan kepada mana-mana individu tanpa mengira

jantina, usia, kaum ataupun agama termasuklah kepada **golongan yang tidak berdaya seperti kanak-kanak.**

18. Kaum lelaki juga tidak boleh memandang enteng akan isu ini memandangkan kaum lelaki juga turut tidak terkecuali daripada gangguan seksual. Inventori di bawah Pusat Sokongan Sosial Setempat (PSSS) Yayasan Kebajikan Negara (YKN) mencatatkan jumlah mangsa gangguan seksual yang membuat laporan kepada PSSS sepanjang 12 siri jerayawara ini diadakan adalah seramai 1,213 mangsa, dengan

sekurang-kurangnya 351 (28.9%) daripadanya adalah mangsa lelaki.

19. Berdasarkan pendekatan Islam, mencegah adalah lebih baik dari merawat. Oleh yang demikian, salah satu cara untuk mencegah gangguan seksual menurut Islam adalah dengan mengamalkan etika pergaulan antara lelaki dan perempuan. Antaranya ialah menahan pandangan yang mana dalam pertemuan antara lelaki dengan wanita, mereka perlu menjaga pandangan agar tidak timbul niat yang tidak baik untuk mengelakkan fitnah. Seperti yang difirmankan dalam

ayat 30 surah An-Nur, Allah mengingatkan kaum lelaki agar menyekat pandangan mereka dari melihat yang haram dan menjaga kehormatan daripada melakukan zina.

قُلْ لِلْمُؤْمِنِينَ يَغُضُّوا مِنْ أَبْصَارِهِمْ وَيَحْفَظُوا فُرُوجَهُمْ ذَلِكَ أَزْكَى لَهُمْ إِنَّ اللَّهَ خَبِيرٌ بِمَا يَصْنَعُونَ

Katakanlah (wahai Muhammad) kepada orang-orang lelaki yang beriman supaya mereka menyekat pandangan mereka (daripada memandang yang haram), dan memelihara kehormatan mereka. Yang demikian itu lebih suci bagi mereka; sesungguhnya Allah Amat Mendalam PengetahuanNya tentang apa yang mereka kerjakan.

20. Lantaran itu, menyadari keperluan untuk menangani masalah gangguan seksual ini daripada terus menjadi barah dalam masyarakat dan negara, Kementerian Pembangunan Wanita, Keluarga dan Masyarakat (KPWKM) telah menggubal **Akta Antigangguan Seksual 2022 [Akta 840], sebagai suatu Akta khusus untuk menangani kesalahan gangguan seksual.**
21. Akta ini diharap dapat membantu mangsa untuk tampil melaporkan kejadian gangguan seksual supaya tindakan dapat diambil dengan sewajarnya dan remedi dapat diberikan kepada mangsa.

22. Penguatkuasaan Akta ini telah dilaksanakan **secara berperingkat mulai 28 Mac 2023** yang melibatkan takrifan gangguan seksual dan elemen kesedaran, pendidikan serta pemahaman mengenai gangguan seksual kepada masyarakat.

(A) **PELAKSANAAN PROGRAM JERAYAWARA KASIH KPWKM @ADVOKASI ANTIGANGGUAN SEKSUAL**

Puan-puan, tuan-tuan, hadirin yang saya kasihi sekalian.

22. Pelaksanaan **Program Jerayawara KASIH KPWKM@Advokasi Antigangguan Seksual** ini diharapkan dapat:

- (i) **Memberikan pendedahan** dan pengetahuan kepada masyarakat mengenai gangguan seksual;
- (ii) **Menyebarkan pemakaian garis panduan** dan notis antigangguan seksual kepada semua lapisan masyarakat;

- (iii) **Menyampaikan maklumat** berkenaan bantuan dan perkhidmatan psikososial yang disediakan oleh KPWKM terutama dalam menangani gangguan seksual; dan
- (iv) **Menjalinkan kolaborasi strategik** dengan semua pihak bagi meningkatkan pencegahan dan kesedaran gangguan seksual.

23. Program ini juga bertujuan untuk memberikan kesedaran, pendidikan mengenai gangguan seksual agar **budaya menormalisasikan gangguan seksual dapat dihapuskan.**

Inisiatif yang boleh dilakukan termasuk menyediakan platform latihan untuk pekerja sosial dan sukarelawan, serta **meningkatkan pengetahuan pekerja di tempat kerja tentang tindakan yang perlu diambil jika ada aduan gangguan seksual.**

24. Di samping itu, pelaksanaan ini juga adalah selaras dengan Akta Kerja 1955 (Pindaan) 2022 yang telah berkuatkuasa pada 1 Januari 2023 yang turut mewajibkan majikan untuk mempamerkan notis mengenai gangguan seksual di tempat kerja.

25. Justeru, KPWKM telah membangunkan **notis antigangguan seksual** yang boleh dimuat turun melalui Kod QR dan laman web Jabatan Pembangunan Wanita (JPW) untuk dipaparkan di setiap organisasi termasuk premis awam dan swasta.
26. KPWKM juga turut melaksanakan Bengkel Kejurulatihan bagi Anti Gangguan Seksual melalui Institut Sosial Malaysia. Ia bagi
- i. **Memberikan kefahaman dan pengetahuan** kepada bakal jurulatih mengenai Akta Antigangguan Seksual 2022 (Akta 840);

- ii. **Meningkatkan kefahaman dan kemahiran** bakal jurulatih berkaitan isu antigangguan seksual (AGS);
- iii. **Meningkatkan kefahaman mengenai dinamika pendidikan andragogi** dalam penyampaian ceramah yang berkesan mengenai AGS; dan
- iv. **Menambah baik kaedah penyediaan** instrumen latihan dalam pengajaran dan pembelajaran *Training of Trainers* (TOT) AGS.

27. Bengkel ini dilaksanakan di enam (6) Zon iaitu di Utara, Tengah, Selatan, Timur, Sabah dan Sarawak. Bagi yang berminat untuk menyertai bengkel ini, boleh mendaftar di reruai pameran ISM yang ada di sini pada hari ini.
28. Selain itu, Program Jerayawara KASIH KPWKM @Advokasi Antigangguan Seksual juga bertujuan untuk menguar-uarkan penyampaian perkhidmatan yang disediakan oleh jabatan dan agensi di bawah Kementerian Pembangunan Wanita, Keluarga dan Masyarakat melalui pelbagai aktiviti dan reruai pameran yang disediakan.

29. Antara jabatan dan agensi di bawah Kementerian yang terlibat adalah Jabatan Pembangunan Wanita, Jabatan Kebajikan Masyarakat, Lembaga Penduduk dan Pembangunan Keluarga Negara, Institut Sosial Malaysia, Lembaga Kaunseling Negara, dan Yayasan Kebajikan Negara.
30. Turut bersama dengan KPWKM pada hari ini adalah rakan strategik Kementerian seperti Jabatan Bantuan Guaman,

Jabatan Kesihatan, Pertubuhan Keselamatan Sosial (PERKESO), Kumpulan Wang Simpanan Pekerja (KWSP), Lembaga Tabung Haji, Perbadanan Tabung Pendidikan Tinggi Nasional (PTPTN), Jabatan Kehakiman Syariah, NGO Usahanita dan lain-lain lagi.

31. Selain itu, terdapat juga gerai-gerai jualan produk-produk daripada usahawan-usahawan wanita di bawah Jabatan Pembangunan Wanita, Yayasan Kebajikan Negara dan Jabatan Kebajikan Masyarakat.

32. Di kesempatan ini, saya juga memohon kepada hadirin sekalian untuk berkongsi maklumat mengenai Advokasi Antigangguan Seksual kepada keluarga, sanak saudara serta rakan-rakan sebagai usaha untuk memberikan kefahaman kepada masyarakat di dalam komuniti kita.

(B) HARAPAN

Puan-puan, tuan-tuan, hadirin yang saya kasihi sekalian.

33. Saya berharap dengan kebersamaan agensi Kerajaan, sektor korporat, Badan Bukan Kerajaan (NGO) serta seluruh masyarakat untuk bekerjasama agar kes gangguan seksual dapat dibendung dan sekaligus menyediakan persekitaran yang selamat kepada setiap lapisan masyarakat bukan sahaja wanita malahan lelaki serta kanak-kanak.
34. Tuan-tuan dan puan-puan sekalian, mutakhir ini dunia digegarkan dengan kezaliman zionis Israel laknatullah di bumi

Palestin. Kezaliman, penindasan, keganasan Israel terhadap Palestin, khususnya di Gaza ini adalah perbuatan keji yang mengorbankan nyawa kebanyakannya terdiri daripada wanita dan kanak-kanak yang tidak berdosa.

35. Justeru, ayuh semua tidak kira kaum dan agama kita bersolidariti bersama-sama Palestin membantah tindakan Zionis yang kejam lagi zalim ini. Marilah kita sama-sama berdoa agar rakyat Palestin akan mendapat keadilan dan dipelihara oleh Allah SWT.

36. Sebagai penutup, izinkan saya mengakhiri ucapan dengan serangkap pantun:

***Istana Raja Megah di Arau,
Padang Besar Sempadan Negeri,
Jangan Keliru Senda dan Gurau,
Gangguan Seksual Kita Perangi.***

37. Akhir kalam, dengan lafaz “Bismillahir Rahmanir Rahim”, sukacita saya melancarkan **Program Jerayawara KASIH KPWKM @Advokasi Antigangguan Seksual Negeri Perlis.**

Sekian, Wabillahi taufiq walhidayah

Wassalamualaikum warahmatullahi Wabarakatuh.